

Fobitro Injil Shorif 18 nombor sifara al-Filimon Forisiti

Alla Pakor hukume Hozrot Isa al-Mosir kas sahabi Hozrot Pauluse (ra:) ou sifara leksoin. Hozrot Isae behesto toshrif neoar onuman 27 bosor bade ikan sitir akare leka oise.

Hozrot Filimon asla Isa al-Mosir ekzon namqora ummot. Tain Kolosi taunor Isaei zomator ek zon. Onisim name tan ek qorida gulam asil. Hozrot Paulus (ra:) zebila zelo bondi asla, ou shomoe Onisim tar munib Filimonor ges taki bagia kunu surote Paulusor gese aisil. Hozrot Paulusor mazdia-u Onisim Isaei imandar hishabe Paulusor ekzon bishesh kadim oisoin. Tara duiozone foramish qorla, Onisim tan munib Filimonor gese firia zaiba, ar tan agor bul shikar qoria maf saiba. Hozrot Pauluse Filimonor gese onurud qori lekla, tain zanu tan agor gulamre firof nein ar okon qali gulam hishabe nae, ekzon Isaei bai hishabe-o shomzia nein.

Ou sifarat deqa zae, gulam ar munibor maze kunu bedabed nai, Hozrot Isar ummot oar bade hoqolu ek shoman. Ar zomator murobbi neta Hozrot Pauluse shadaron mummin okolor ufre netagiri, hukumdari na qoria borong nizore nisa qoria zomat okol salaira. Tan maze kunu betagiri ba borai-bahaduri nai.

Ermaze ase,

- (1) Hozrot Paulusor salam 1:1-3 *aeat*
- (2) Hozrot Pauluse Filimonor tarif qorla 1:4-7

(3) Onisimre frot neoar lagi onurud 1:8-21

(4) Hozrot Paulusor shesh kota 1:22-25

Hozrot Paulusor salam

¹ Ami Paulus, Isa al-Mosir lagi bondi asi. Ami ar amrar bai Timotie, amrar logor toblig korra maear dust Filimonor gese lekram. ² Boin Afia, amrar loge imanor zudda Arkipas ar tumar barir zomator hoKolre salam zanairam.

³ Amrar gaibi baf Alla Pake ar Hozrot Isa al-Mosie tumrar ufre rohomot ar shanti nazil koroukka.

Hozrot Pauluse Filimonor tarif korla

⁴ Ami hamesha munazator shomoe tumar kota iad korla Allar shukria adae kori. ⁵ Karon Hozrot Isa al-Mosir ufre tumar iman ar pak bonda okolor bae tumar mohobbotor kota ami hunchi. ⁶ Ami dua kori, mumin okolor loge tumar katirshomporko aro barouk. Tumi to zano, al-Mosir katire Allae amrare koto bala bala niamot bilai disoin. ⁷ Bai, tumar mohobbot dekia ami kub kushi oisi ar utshaho faisii, tumi to Allar pak bonda okolor dilo aram diso.

Onisimre frot neoar lagi onurud

⁸ Tumar i bab dekia ami tumare ekan kota koitam sairam. Ami to al-Mosir name tumare hukum ditam farlam one, tumar kam fura korar lagi. ⁹ Oile mohobbotor katire hukum na dia tumare minot koriar. Ami Paulus ou murobbi boesho al-Mosir lagi bondi halote tumar gese i minoti korram. ¹⁰ Amar aolad Onisimor lagi arzi zanairam, ami zelo bondi taka halote he iman

ania amar aolad bonigese. ¹¹ Eḵ shomoe tumar gese he beḵama asil, oile oḵon amar ar tumar gese he bout ḵamaora bonigese.

¹² Zai ouk, amar zanor taki beshi maear ou manshore ami tumar gese firot faḵairam. ¹³ Ami tare amar gese raḵtam saislam, zate kush-ḵobrir dae bondi halote tumar oia he amar ḵezmot ḵorto fare. ¹⁴ Oile tumar izazot saḵa ami kunta ḵorlam na, zate zur ḵoria tumar bala ḵam adae ḵora na lage. Ami sairam, tumi niz takiu ou ḵam ḵoro. ¹⁵ Tumi zate siroḵalor lagi tare firia fao, oite fare ou ḵaroneu he tumar ges taki tuḵa dinor lagi horia asil. ¹⁶ Oile tumi oḵon tare ar gulam hishabe faitae nae borong gulam taki boḵo, mani maear bai hishabe faibae. Ḵas ḵori he amar kub maear manush, oḵon tumar geseo he aro maear, ḵali roḵto-mangshe nae, imandar bai hishabe maear.

¹⁷ Erdae tumi zudi amare ekoi imanor bagi zano, te amare zela ḵobul ḵorar ḵota, tare-o ola ḵobul ḵorio. ¹⁸ He zudi tumar kunu ḵeti ḵoria taḵe ar tar gese tumar kunu faona taḵe, te mono ḵorio, i faona tumi amar gese fao. ¹⁹ Ami Pauluse nizor ate lekia zanairam, tumar faona ami dilaimu. Ashole ami ḵoitam sairam na ze, tumar nizor zanor lagi-u tumi amar gese rini aso. ²⁰ Bai Filimon, Allar oaste eḵan ḵam ḵoro, eḵzon imandar bai hishabe amar zano aram deo. ²¹ Tumi amar ḵota raḵbae zania-u, tumar gese ou siḵikan leḵlam. Ami mono ḵori, ami zeta ḵorar lagi ḵoiram, er taki beshi tumi ḵorbae.

Hozrot Paulusor shesh ḵota

²² Huno, aro ekan kota koiram, tumi amar lagi memenor kuṭa ṭik korio rakio. Ḳaron ami asha koṛram, tumrar duar usillae amare tumrar gese firot deoa oibo.

²³ Abu-Farase tumare salam disoin, tain Isa al-Mosir lagi amar loge oia bondi asoin. ²⁴ Ar amar logor tobligkari Markus, Aristakus, Dimas ar Luke-o tumare salam zanaira.

²⁵ Amrar Hozrot Isa al-Mosir rohomot tumrar dilo ḳaim rouk. Amin.

Sylheti New Testament (Latin)
Sylheti: Sylheti New Testament (Latin) New
Testament+

copyright © 2014 Ahle Kitab Society

Language: (Sylheti)

Contributor: The Seed Company

All rights reserved.

2020-11-30

PDF generated using Haiola and XeLaTeX on 22 Feb 2024 from source
files dated 29 Jan 2022
2eb27397-6d35-5c13-b811-aecd7920507c